

四庫全書

子部

欽定四庫全書

冊府元龜卷一百八十 宋 王欽若等 撰

帝王部

失政 濫賞

失政

粵若居大寶之位守富有之業莫不議道自己制法於
民政令繇我而行風教從我而立億兆繫於舒慘宗社
屬於安危本或先顛道之斯廢若乃驕非期而自至欲

敗度以攸縱喻于五音也宮亂則荒著於六籍也禮失則奢德之下衰天或是厭唐虞以前禮俗樸素詩書之簡策無越厥猷夏商而降物儀明備役志于享袞職或闕故有徵求往訓以著乎深戒敷陳前說以志其失德及乎小雅興刺近臣獻規所以交修彌縫之深切者也夏太康尸位以逸豫滅厥德黎民咸貳在位二十九年失政而亡

孔甲立性好方鬼神事淫亂夏后氏德衰諸侯叛之

桀不務德而虐傷百姓百姓不堪乃召湯而囚之夏臺
已而釋之湯修德諸侯皆歸湯湯遂率兵以伐桀走鳴
條遂放而死桀謂人曰吾悔不遂殺湯於夏臺使至此
也

商太甲立三年不明暴虐不遵湯法

紂厚賦稅以實鹿臺之財而盈鉅橋之粟以西伯昌鬼
侯邢侯為三公鬼侯有女入之紂鬼侯女不喜淫紂殺
之而醢鬼侯邢侯爭之并脯之西伯聞之竊歎崇侯虎

知之以告紂紂囚西伯美里既而釋之

周厲王即位三十年好利近榮夷公以為卿士用事王

行暴虐侈傲國人謗王王怒得衛巫

衛國之巫

使監謗者以

告則殺之國人莫敢言道路以目三年相與叛襲厲王

出奔於彘

彘晉地漢縣屬河東

宣王不脩藉於千畝虢文公諫曰不可王弗聽宣王既

亡南國之師

敗于姜戎時所亡也

乃料民於太原

料數也

仲山甫諫

曰民不可料也王弗聽

幽王以號石父為卿用事國人皆怨曰石父為人佞巧善諛好利而王用之

桓王失於信禮義陵遲男女淫奔讒偽並作諸侯背叛搆怨連禍九族不親故詩人刺之

僖王自即位以來變文武之制作玄黃華麗之飾宮室崇峻奢侈故孔子譏焉

惠王即位奪其大臣為國之田以為圃大夫邊伯等五

人作亂

五人者為國邊伯
詹父子禽祝蹇也

靈王二十五年穀洛鬪將毀王宮王欲壅之太子晉諫
不聽卒壅之亂於是始

漢元帝被疾不親政事方隆好于音樂以中書令石顯
久典事中人無外黨精專可信任遂委以政事無大小
因顯白決貴幸傾朝百僚皆敬事顯

成帝耽于酒色飛鷺亂內外家擅朝

哀帝即位待詔夏賀良等言赤精子之讖漢家歷運中
衰當再受命今宜改元易號乃以建平三年為太初元

年號曰陳聖劉太平皇帝漏刻以百二十為度又大司馬董賢見幸武庫禁兵尚方珍寶選物上第盡在董氏乘輿乃其副也

後漢安帝之初委政太后十有餘年及親萬幾佞邪始進閹宦用事寵加私愛阿母王聖勢傾朝廷遂樹姦黨搖動儲副山陵未乾蕭牆作難兵交禁省社稷殆危

桓帝惡大將軍梁冀輔政縱橫為亂與中常侍單超等五人共謀誅之於是封超等為五侯五侯暴恣日甚毒

流天下白馬令李雲坐直諫誅名惡少府李膺等並為

關人所譖誣為黨人下獄死

又云桓帝封殖宦豎羣妖滿側諸姦彌興賢良被辜

政荒民散
亡徵漸積

靈帝收天下田畝十錢以治宮殿發太原河東豫章材木黃門常侍斷截州郡送材文石掌主吏譴呼不中度賣之貴戚因緣賤買十倍入官其貴戚所入者然後得中宮室連年不成州郡因增加調發刺史二千石遷除皆責助治宮錢大郡至二千百詔所徵皆令西園騶密

約初號曰中使恐動州郡多受財賂天下騷動起為盜

賊矣

一云靈帝不恤宗緒不祇天命爵服橫流官以賂成自公侯卿士降于卑隸百官下級無不以貨刑

戮無辜元忠被黜佞諛在側直言不聞是以賢智困窮忠良擯于下位遂至姦邪蜂起法防隳廢夷狄並侵盜

賊方鷙小者帶城邑大者連州郡編戶騷動人人思亂矣

魏明帝於芳林園北立八坊諸才人以次序處其中其秩石擬百官之數帝嘗遊宴在內乃選女子知書可付信者六人以為女尚書使典省外奏事處當畫可

晉武帝平吳之後天下乂安遂怠於政術耽遊宴寵愛

后黨臣貴當權舊臣不得專任彛章奏廢請謁大行矣

又云武帝平孫皓納吳妓五千是同皓之弊婦人之封失國亂政追贈外曾祖母違古之道凡此非事並見前書誠有玷於蔽猷史氏所不敢蔽也

惠帝在位政出羣下紀綱大壞貨賂公行勢位之家以貴陵物忠賢絕路讒邪得志更相薦舉天下謂之互市焉

孝武帝初耽酒色末年始為長夜之飲醒日既少多居內殿留連於盤樽之間時張貴人寵冠後宮威行閭內

後周宣帝大象元年二月傳位與皇太子自稱天元皇帝
所居三天臺冕二十有四旒車服旗章皆以二十四為
節內史御正皆置上大夫皇帝稱正陽宮置納言御正
諸衛等官皆准天臺尊皇太后為天元皇太后十二月
行幸雒陽帝親御驛馬日行三百里皇后及文武侍衛
數百人並乘驛以從令四后方駕齊驅或有先後便加
譴責人馬頓仆相屬於道二年正月造二宸畫日月象
以置左右二月改制詔為天詔勅為天勅三月詔天臺

侍御之官皆著五色及紅紫雲衣以雜色緣名曰品色衣有大事與公服間服之是月詔內外命婦皆執笏共拜宗廟及天臺皆俛伏帝自禪位之後彌服驕奢耽酗於後宮或旬日不出公卿近臣請事者皆附門官奏之唯自尊崇無所顧憚國典朝位率情變改後宮位號莫能詳錄每對臣下自稱為天以五色土塗所御天殿各隨方色羣臣朝天臺者致齋三日清身一日車旗章服倍於前王之數既自比上帝不欲令人同已嘗自帶綬

及冠通天冠加金附蟬顧見侍臣武弁上有金蟬及王
公有綬者並令去之又不聽人有高大之稱諸姓高者
改為姜九族稱高祖者為長祖曾祖為次祖官稱名位
謂上及大者改為長又禁天下婦人皆不得施粉黛惟
宮人得焉又恐羣臣規諫不得行已之志嘗遣左右密
伺察之動止所為莫不抄錄少有乖違輒加其罪自公
卿以下皆被楚撻其間誅戮黜免者不可勝言每捶人
皆以百二十為度名曰天杖宮人內職亦如之又令拜

者皆以三拜成禮

隋高帝仁壽中用法益峻帝既喜怒不常不復依準科律時越國公楊素素被委任素又稟性高傲公卿股栗不敢參言素與鴻臚少卿陳延不平經蕃客館庭中有馬屎又庶僕羶上擣蒲旋以白帝帝怒曰主客令不灑掃庭內掌固以私戲汙敗官羶罪狀何以加此者令西市棒殺榜筮陳延殆至於死

煬帝大業末軍國多務日不暇給帝方驕怠惡聞政事

究屈不治奏請罕決

唐高宗永徽六年十月廢皇后王氏為庶人立昭儀武氏為皇后乾封元年正月己巳封泰山庚午禪於社首以皇后武氏為亞獻越國太妃燕氏為終獻上元二年三月帝風疹不能聽朝政事皆決於皇后自誅上官儀之後帝每視朝皇后垂簾於御座後政事大小皆預聞之內外稱為二聖帝欲下詔令皇后攝國政中書侍郎郝處俊諫止之

中宗神龍初立妃韋氏為后時昭容上官氏嘗勸后行則天故事乃上表請天下士庶為出母喪服又請百姓以年二十三為丁五十九而免役改易制度以收時望制皆許之又左右內職時許出禁中上官氏及宮人貴幸者皆立外宅出入不節朝官邪佞者候之恣為狎遊祈共賞拔以至要官時侍中敬暉謀去諸武武三思患之乃結上官氏以為援因得幸於韋后潛入宮中謀之乃挾百官上帝尊號為應天皇帝韋后為順天皇后三

年九月帝與后親謁太廟告謝受尊號之意是月改元
景龍三思之入用事敬暉王同皎相次夷滅天下咸歸
咎於韋后景龍三年十一月乙丑親祀南郊皇后發壇
亞獻左僕射舒國公韋巨源為終獻皇后又欲寵樹安
樂公主乃制公主開府置官屬下比親王長寧安樂二
府不置長史而已宜城公主以非后所生請各減太平
之半安樂恃寵驕恣賣官鬻獄勢傾朝廷嘗自草制勅
掩其文而請帝畫焉帝笑而從之竟不省視又上官昭

容與其母鄭氏及尚宮柴氏賀婁氏樹用親黨廣納貨賂別降墨勅斜封授官臧獲屠販之類累居榮秩

玄宗天寶四載冊太真妃楊氏為貴妃范陽節度使安祿山請為貴妃養兒入對皆先拜太真遂命楊雲已下並約為兄弟十一載十一月以貴妃從祖兄御史大夫國忠為右相十三載正月祿山謁於華清宮請為閹廐三十羣牧等都使又請知總監事帝筋脚馬皆陰令擇之三月人從范陽來言反者帝必大怒至送與之十四

載十一月祿山果叛三稱奉命以兵討逆人楊國忠是時天下承平日久人不知戰聞其兵起朝廷恟懼十二

月祿山渡河遂入陳留郡又入東京十五載六月潼關

不守帝乃幸蜀

憲宗元和末謂宰臣曰朕讀玄宗實錄見開元初銳意求理至十六年已後稍

似懈倦開元末又不及中年何也崔羣對曰玄宗久歷民間身經屯難故即位之初知人疾苦躬勤庶政加之姚崇宋璟蘇頲盧懷慎等守正之輔孜孜獻納故致治平及後承平日久安於逸樂漸遠端士而近小人宇文融以聚斂媚上心李林甫以耳目獲上意終之以國忠故及於亂

肅宗至德二年六月將軍王玄瑛殺本縣令杜徽罪合

死帝以其能備守備之器特放逸令於河東承天軍効力中書舍人賈至上封事執之百寮咸與至同帝以寇逆未平藉其殊藝竟赦之

德宗建中三年以戶部侍郎趙贊判度支括率富商錢以給軍京兆少尹督責頗峻長安尉荷校乘車搜人財貨意其不實即行榜笞人不勝冤痛或有自縊而死者京師蹶然如被賊盜長安為之罷市又令神策軍使白志貞募致禁軍皆以京城沽販之徒充之具問其人皆

在市廛及涇師犯闕詔神策軍拒賊無一人至者

貞元三年八月辛巳朔日有蝕之有司準禮將伐鼓於
大社不許太常卿董晉奏曰伐鼓于社所以責羣陰助
陽光可特宣詔旨以合經義寢不報

十六年六月令三司使推鞠永州刺史楊履時觀察使
呂渭奏履犯賊履又表自言當州營備錢物上獻為上
使所鞠案因令中使王文湊就州取履至京師三司使
訊其所妄破用履云市馬進訖及訊其馬於何人處買

及價值齒歲履答狀馬主東西南北貴公子也今不知所在言馬齒歲案禮經齒路馬者當誅今不敢言其他狀款多如此類帝悅其進奉之言不責也但令免官而已

十八年七月嘉王諮議高弘本正衙奏事自理逋債詔曰朕方勵精庶政博求嘉言比者百官正衙奏事至有多時者公卿庶僚屬當寒暑為弊亦深在於朕懷豈謂今日自今勿正衙奏事如陳奏者宜延英門請對正衙

奏事不易之典也武德貞觀之間孜孜論道君臣講陳
政事謁見無時不容踈矣其後正朝奏御凡在列位無
不上達高弘本黷禮罪之可也因人而廢其事不可也

帝自貞元八年貶竇參十年陸贄免相之後躬親庶政
不復委成宰相廟堂備員行文書而已除守宰御史皆
自選擇然居深宮所狎而取信者裴延齡李齊運王台
李實韋執誼韋渠牟皆權傾相府延齡李實姦欺多譎
甚傷國體名無所發明而渠牟名素輕頗張聲勢以趨
趨嚮者帝既偏有所聽浮薄者卒皆進用不復藏器蘊
德皆奔走請謁利
蹄甘辭以附渠牟

憲宗元和十三年九月以戶部侍郎判度支皇甫鏞衛

尉卿充諸道鹽鐵轉運使程异同平章事並依前判使是時帝切於財賦故用聚斂之臣居相位詔書既下物情駭異至於賈販無識亦相嗤誚宰相崔羣裴度以物議上聞帝怒而不聽度上疏論之是時帝以世道漸平欲肆意娛樂池臺館宇稍增崇飾异鑄探知上旨數貢羨餘以備經構故帝獨排物議相之見度疏以為朋黨竟不省覽

敬宗以長慶四年正月丙子即位三月甲寅始對宰臣

等於延英殿戊辰百寮入閣日絕高未坐帝即位以來
坐朝皆晚此日尤甚羣臣候立紫宸門外有不任其久
幾欲頓踣者諫議大夫李渤出次白宰相曰昨日已有
疏論坐晚今日又益晚今不能回上意是渤之罪請出
閣赴金吾仗待罪有頃既坐百官班退左拾遺劉栖楚
獨留帝前進諫曰臣歷觀前王嗣位之初莫不躬勤庶
政坐以待旦陛下即位以來放情嗜寢樂色忘憂安臥
宮闈日晏方起西宮密邇未過山陵鼓吹之聲日喧於

外伏以憲宗皇帝大行皇帝皆是長君恪勤庶政四方猶有叛亂陛下運當少主即位未幾惡德布聞臣恐福祚之不長也臣忝諫官致陛下有此請碎首以謝遂以額叩龍墀久之不已宰相李逢吉出位宣曰劉栖楚休叩頭候進止栖楚捧首而起因更陳論搯額見血帝為之動容以袖連揮令出栖楚又云不可臣奏臣即碎首而死中書侍郎牛僧孺復宣示栖楚曰所奏知門外待進止栖楚即拜舞而出待罪於金吾仗然後宰臣更贊

其事於帝前命中人就仗宣諭并李渤並令各且歸第
寶曆元年七月拾遺李漢舒元褒薛廷老於閣內論近
日除授往往不由中書進擬多是內中宣出臣恐紀綱
寢壞姦邪恣行伏希察詳帝然之是歲詔度支進銅鏡
三千斤金薄十萬番脩精思院新殿及歸德殿圖障帝
性本好土木自春至冬興作相繼嘗幸凝碧池令兵士
千餘人於池中取大魚送入新池又好深夜自捕狐狸
宮中謂之打夜

文宗開成元年三月皇城留守郭畋奏以城內諸司所管羽儀法物內鎗刀利器等納入軍器使如本司要立仗行事請給儀刀從之凡朝廷法物各有司存而以訓注之禍懼內官猜阻而輕廢舊典上位者不能持正論之

後唐莊宗同光二年五月以教坊使陳俊為景州刺史內園使儲德源為憲州刺史皆梁之伶人也初帝平梁俊與德源皆為寵伶周匝所薦帝因許除郡樞密院郭

崇韜以為不可伶官言之者衆帝密召崇韜謂之曰予已許除郡經年未行我慙見二人卿當屈意從之故有是命

十一月癸卯帝畋於伊闕命從官拜梁祖之陵物議非之

十二月庚午帝與皇后劉氏幸河南尹張全義第酒酣帝命皇后拜全義為養父全義惶恐致謝復出珍貨貢獻翌日皇后傳旨令學士草謝全義書趙鳳密疏陳國

后無拜人臣為父之禮帝雖嘉之竟不能已其事

是月以教坊使王承顏為興州刺史末年誅郭崇韜朱友謙之後閹豎伶官交相讒諂邦國大事皆聽其謀繇是漸多猜惑及魏博軍變宰臣豆盧革率百官上表請出內府金帛優給將士不報時知星者上言客星犯天庫宜散府藏又云流星犯天躔主御前有急兵帝召宰臣於便殿皇后出宮中粧奩銀盃各二并皇子蒲哥三人謂宰臣曰外人謂內府金寶無數向者諸侯貢獻旋

供賜與今宮中有者粒奩嬰孺而已可驚之給軍草等
皇恐而退

明宗天成元年九月北京奏准宣旨於係省賣麴錢上
每貫割留二百文充本府公使初以朱守殷為河南尹
守殷位兼平章事與諸貴要近臣宰執交歡宴會時集
於府第復又妓侍盈室每見安重誨任圜言府司無利
潤支費不充執政計無從出即以分割麴錢議聞奏從
之諸道州使因以為例

長興三年七月邠州奏丹山縣令張浩為新平縣令昨
進奏院遞到正授告身欲給之時再問行止乃稱丹山
縣令名銜是亡兄承禋浩即曾有三處攝牒恐礙格條
不敢給授其告身却進納中書引驗其前告身名承禋
勅旨並令焚毀赦浩冒名之罪凡中書除官堂吏必依
格條追前任名銜而將承禋為浩偽濫顯然蓋藏其姦
有此除授而又特赦冒名不罪堂吏則賄賂囊橐之弊
無時能革時有田審回者論冒名得官人遂城縣令魏

欽緒事下御史臺推勘欽緒棄市今赦承禋而罪欽緒
法令如此可謂大哀矣

濫賞

夫慶賜之行貴於至當祿秩之設戒乎虛授故才罔稱
職彼其之刺興賞靡酬功不祥之說著允矣哉太宰之
八柄其為御下之要也周室之後王綱或紊以至饗宥
之數不協於禮文賞賚之典或私於嬖倖以官爵為市
靡思於任賢行姑息之政頻加於橫賜其或以宴樂為

務獎優笑之流專耳目之翫喜竒巧之技或訾其詆訐
之用啓乎偷薄之源或錄其纖微之勞奈乎經常之制
傳曰古之善為國者賞不僭僭則懼及淫人斯可戒矣

周惠王時虢公晉侯朝王王饗醴命之侑皆賜玉五鼓

馬三匹非禮也雙玉為鼓王命諸侯名位不同禮亦異數侯而

與公同賜是借人禮

漢文帝時鄧通權船為黃頭郎帝尊幸之賞賜通鉅萬

以十數每賜輒鉅萬官至上大夫
如此者十數

十五年趙人新垣平以望氣見帝於是貴平至上大夫
賜累千金

武帝即位明年齊人少翁以方見帝乃拜少翁為文成
將軍賞賜甚多以容禮之

元狩元年春樂成侯登上書言樂大膠東宮人

王家
人

言

黃金可成而河決可塞不死之藥可得僊人可致廼拜
大為五利將軍居月餘得四印封為樂通侯賜列侯甲
第童千人乘輿斥車馬帷帳器物以充其家

斥不
用者
又以

衛長公主妻之齋金十萬斤又韓媽帝為膠東王時媽與帝學書相愛及即位欲事伐胡而媽先習兵以故益尊貴官至上大夫賞賜擬鄧通

成帝時淳于長遷水衡都尉侍中至衛尉九卿久之趙飛燕貴幸帝欲立以為皇后太后以其所出微難之長

主往來通語東宮

主猶專

歲餘趙皇后得立帝甚德之廼

追顯長前功下詔曰前將作大匠解萬年奏請營作昌

陵罷契海內

罷讀日疲

侍中衛尉長數白宜止徙家反故處

陵置邑徙人以實之長奏
令止所徙之家各還本家

朕以長言下公卿議者皆合

長計首建至策民以康寧

康是安也

其賜長爵關內侯後遂

封為定陵侯大見信用貴傾公卿外交諸侯公卿牧守

賂遺賞賜亦系鉅萬

系古累字下同

張放襲富平侯臨子也母敬武公主

元帝妹也

鴻嘉中成帝

欲遵武帝故事與近臣遊宴故以公主子開敏得幸放

取皇后弟平恩侯許嘉女帝為放供帳賜甲第充以乘

輿服飾號為天子取婦皇后嫁女太官私官並供其第

私官皇后
之官也

賞賜以千萬數

哀帝為太子時董賢為舍人哀帝立拜為黃門郎旬月
間賞賜累鉅萬貴震朝廷為賢起大第北闕下重殿洞
門土木之功窮極技巧柱檻以綈錦下至賢家僮僕皆
受上賜及武庫禁兵上方珍寶其選物上第盡在董氏
而乘輿所服廼其副也帝欲侯賢而未有緣會待詔孫
寵息夫躬等告東平王雲右謁祠祀呪詛下有司治皆
伏其辜帝於是令躬寵為因賢告東平事者廼以其功

下詔封為高安侯

後漢桓帝延熹中連歲征伐府帑空虛乃假百官俸祿
王侯租稅中常侍侯覽亦上縑五千疋賜爵關內侯又
託以與議誅梁冀功進高鄉侯

靈帝初中常侍曹節與長樂五府史朱瑀從官史龔普
張亮中黃門王尊長樂謁者徐騰等一十七人矯詔以
長樂食監王甫為黃門令將兵誅竇武陳蕃武等已誅
節遷長樂衛尉封育陽侯增邑三千戶甫遷中常侍黃

門令如故瑀封都鄉侯千五百戶普亮等五人各三百戶十一人皆為關內侯歲食租二千斛先是瑀等陰於明堂中禱皇天曰竇氏無道請皇天輔皇帝誅之令事

必成天下得寧既誅武等詔令太官給饗具

饗報祠也音蘇代切

賜瑀等錢五十萬餘各有差後更封華容侯二年節病因詔拜為車騎將軍有頃疾瘳上印綬罷復為中常侍位特進秩中二千石尋轉大長秋節又與王甫等誣奏桓帝弟渤海王悝謀反誅之以功封者十二人甫封冠

軍侯節舊封育陽侯亦增邑四千六百戶并前七千六百戶

後魏宣武時左中郎將王仲興值咸陽王之出奔也當時上下微為駭震宣武於乾脯山遣仲興馳入金墉城安慰後參機要殆與有功者等

唐穆宗以元和十五年正月即位賜左右神策軍兵士錢每人五十貫六軍威遠每人三十貫左右金吾每人五十貫非故事也

自憲宗御宇至穆宗登祚及長慶二年十八年矣凡朔方吳蜀洎山東西

河累興問罪之師其間兵戈少息者無一歲故帝自幼細聞軍旅之事謂戎臣武卒常宜姑息繼統之始財以恣行給資神策禁旅洎左右三軍兵健號長行者其名寃末人尚獲五萬至於非時賜與不可勝紀驕橫難戢其勢已甚今又降優假之詔俾其蕃大復有工賈胥吏窺昇朝籍者厚持緜貨納于方鎮大鎮嗜利者即以大將文符給之偽其職秩年月未幾則薦聞必曰某以歲久宜遷某以殊勲合與宰臣奏擬下得王官欲望兵復于農官清其序難矣

敬宗以長慶四年正月即位二月辛卯召家令寺典張鏐入內賜緋魚袋甲午以鏐為家令寺小吏賜緋之後又連有是命人頗異之三月壬子帝幸內園賜優人康

赫赤金紫丁卯帝幸神策軍賜力士韓筋櫛錦綵三十
疋銀器二事庚午賜教坊錢一萬貫以備行幸樂官一
十三人並賜緋乙亥帝幸教坊賜俳優綾絹三千五百
疋十一月丁未賜教坊樂人李臻緋并賜翊善坊宅一
區時穆宗攢宮已啓五日矣龍輶動輒期在旦夕而甲
第朱衣之賜遞及倡優衆皆竊議

寶曆元年七月癸酉賜善奕待詔王倚緋及綵絹銀器
閏七月壬申賜教坊樂官任自達大寧坊宅一區

二年十一月己卯賜翰林僧惟真絹五十疋惟真以異術出入禁署故橫及焉

文宗太和五年三月辛卯以右神策軍散兵馬使檢校太子賓客豆盧著守本官兼殿中侍御史讐告宋申錫謀反故也

後唐莊宗同光元年十月入汴州賜樂人周匝幣帛周匝者帝之寵伶也胡柳之役陷於賊帝素喜優笑每思之至是復得欣然慰接周匝叙其違奉契闊因言偶獲

全者皆偽廷教坊使陳俊之恩也垂泣保薦請除郡守
即時許之議者憤其佞倖

明宗天成元年七月庚辰賜諫議大夫蕭希甫衣段二
十疋銀器五十兩以訟豆盧革韋說之罪非賞典也

八月癸巳賜攝湯陰縣令王延禧主簿柳承翰等緋魚
以帝今春赴難時經過供頓之勞也然主簿賜緋賞典
太過

安重霸初為蜀守秦州聞明宗起河北即時遣使以秦

城等州來降天成初用為閬州團練使未幾召還為左衛大將軍常懷姦佞探人主意明宗尤愛之長興末明宗謂侍臣曰安重霸朕之故人以秦州歸國其功不細酬以團練防禦恐非懷來之道范延光曰將校內有自河東河北從陛下龍飛故人尚有未及團防者今若遽授重霸方鎮恐為竊議明宗不悅未幾竟以同州節鉞授之

晉少帝開運三年詔宗州節度使李守貞近以援送軍

儲殺戮蕃賊繼聞克捷宜示頒宣護聖奉國興順宗順

興國諸軍都指揮使各絹十疋餘自都虞候至散卒七

疋至十疋其隨行人員與諸州本城將士亦有等第賜

賚


史官曰昔衛青霍去病深入虜磧以斬首加級用為定規故謂首級此其義也守貞前引大軍往取瀛州

境復一刺史以退此時言攻幽薊賴張彥澤勦蕃較而回徵師五萬運糧千里行扈所過卷園一空將吏醉飽百草皆除遂使河北生民無措足之所而又軍去有賜謂之挂甲錢來則賞之謂之卸甲錢或微有功名日皆次第優給緡帛動計三十萬數田

力其何以濟良可痛矣良可駭矣

漢高祖以晉天福十二年即位時司天監趙延又冬官

正吳正已徐延浩等進來年歷日賜器皿繒帛有差星官
有祿給進歷日職也前代太史預言氣象水旱災變使
國有備可賞之矣至於中秋老人星見日月薄蝕皆常
事也賜賞非其
時況歷日乎



冊府元龜卷一百八十

欽定四庫全書

子部
冊府元龜卷一百八十一至
三

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣宋枋遠

謄錄監生臣徐紹城

欽定四庫全書

冊府元龜卷一百八十一 宋 王欽若等 撰

帝王部

惡直

疑忌

無斷

惡直

傳曰事君勿欺也而犯之又曰有犯而無隱故古之良臣挺蹇諤之志勵骨鯁之節內懷忠愛情均休戚故有犯顏色觸忌諱獻替可否補救闕失言必逆耳事乃利

國自非人主廓容納之量克已降意則龍鱗人逆鮮或不怒至有勵斧鉞以震威建官司以監謗下幽繫之詔行黜棄之典乃使良士結舌嘉言攸伏良可戒哉書曰予違汝弼汝無面從又曰有言逆於汝心必求諸道誠哉爲邦之丕訓也

夏王桀淫虐諸侯咸叛闕龍逢引黃圖而諫桀以爲妖言焚黃圖而殺龍逢

商王紂既淫亂微子諫不聽乃與太師箕子謀去之比

干曰爲人臣者不得不以死諫乃強諫紂怒曰吾聞
聖人心有七竅剖比干觀其心箕子懼乃佯狂爲奴紂
又囚之

周厲王即位三十年好利近榮夷公大夫芮良夫諫厲
王不聽卒以榮公爲卿士用事王行暴虐侈傲國人謗

王召公諫曰召康公之後穆公虎爲王卿士民不堪命矣王怒得衛巫

衛國之巫也使監謗者以告則殺之其謗鮮矣諸侯不朝三

十四年王益嚴國人莫敢言道路以目以目相視而已厲王喜

告召公曰吾能弭謗矣乃不敢言召公又諫之王不聽
於是國人莫敢出言

漢文帝時袁盎爲中郎將亦以數直諫不得久居中調

爲隴西都尉

調選也

景帝即位以太子太傅石奮爲九卿迫近憚之

以其敬恭履度

故憚之徙奮爲諸侯相

武帝時汲黯爲中大夫以數切諫不得久留內選爲東
海太守召爲主爵都尉亦以數直諫不得久居位

狄山爲博士匈奴求和親羣臣議前

於帝前議事

山曰和親

便帝問其便山曰兵凶器未易數動

言難可屢動

高帝欲伐

匈奴大困平城乃遂結和親孝惠高后時天下安樂及

文帝欲事匈奴北邊蕭然苦兵

蕭然猶騷然擾動之貌也

孝景時吳

楚七國反景帝往來東宮間

謂詔謀於太后也

天下寒心數月

懼於兵難也

吳楚已破竟景帝不言兵

訖景帝之身更不議征伐之事

天下

富實今自陛下興兵擊匈奴中國已空虛邊大困貧繇

是觀之不如和親帝問湯

湯張湯也

湯曰愚儒無知狄山曰

臣固愚忠若御史大夫湯乃詐忠湯之治淮南江都以
深文痛詆諸侯別䟽骨肉使藩臣不自安臣固知湯之
詐忠於是帝作色曰吾使生居一郡能無使虜入盜乎

博士之官故
呼爲生也

山曰不能曰居一縣曰不能復曰居一鄣

問

鄣音之向切謂塞上要險之處別策
爲城因置吏士而爲鄣蔽以折寇也

山自度辯窮且

下吏

度計也見詰自辯
而辭窮當下吏也

曰能乃遣山乘鄣

乘登也登
而守之

至

月餘匈奴斬山頭而去是後群臣震讟

成帝時朱雲上書求見公卿在前時丞相故安昌侯張

禹以帝師位特進甚尊重雲曰臣願賜尚方斬馬劍斷
佞臣一人頭以厲其餘帝問誰也對曰安昌侯張禹帝大
怒曰小臣居下訕上廷辱師傅罪死不赦御史將雲下
雲攀殿檻折後帝意亦解

劉輔以美才擢爲諫議大夫成帝欲立趙婕妤爲皇后
輔上書曰陛下乃觸情縱欲以卑賤之女母天下乎里
語曰腐木不可以爲柱卑人不可以爲主臣辱諫諍之
官不敢不盡死書奏帝使侍御史收縛輔繫掖庭秘獄

後減死罪一等論鬼薪

哀帝寵董賢爲大司馬賢年二十二帝置酒與賢父親屬宴飲帝飲醉從容視賢而笑曰吾欲法堯禪舜何如侍中王闔在坐進諫曰昔周成戲以桐葉封弟叔虞於晉周公入曰天子無戲言今天下乃高帝之天下非陛下之天下也陛下以藩王入奉嗣孝成皇帝後當承宗廟傳子孫於無窮豈得以戲言將高祖社稷輸人邪帝默然不悅終以失旨貶爲郎署

後漢光武建武中內外羣官多帝自選舉加以法理嚴
察職事過苦尚書近臣至乃搖撲率曳於前羣臣莫敢
正言尚書令申屠剛每輒極諫又數言皇太子宜時就
東宮簡任賢保以成其德帝並不納剛以數切諫失旨
數年出爲平陰令

和帝時侍郎光祿大夫李法上疏以爲朝政苛碎違永
平建初故事宦官權重椒房寵盛又譏史官記事不實
後世有識尋功計德必不明信坐失旨下有司免爲庶

人

安帝時蘇章爲議郎數陳得失其言甚直出爲武原令成翊世爲尚書郎安帝時常侍樊豐與帝乳母王聖共譖皇太子廢爲濟陰王翊世連上書訟之又言樊豐王聖誣罔之狀帝既不從而豐等陷以重罪下獄當死有詔免官歸本郡

順帝時宋登爲侍中數上封事抑退權臣繇是出爲潁川太守

桓帝時白馬令李雲上疏言孔子曰帝者諦也今小人
諂進財貨公行是帝欲不諦乎帝怒送黃門北寺獄弘
農五官掾杜衆傷雲以忠諫獲罪上書願與雲同日死
帝愈怒遂并下廷尉大鴻臚陳蕃上疏救雲曰李雲所
言雖不識禁忌干上逆旨其意歸於忠國而已昔高祖
忍周昌不諱之諫成帝赦朱雲腰領之誅今日殺雲臣
恐剖心之譏復議於世矣故敢觸龍鱗冒昧以請太常
楊秉雒陽市長沐茂郎中上官資並上疏請雲帝恚甚

有司奏以爲大不敬詔切責蕃秉免歸田里茂資貶秩
二等時帝在濯龍池管霸奏雲等事霸跪言曰李雲野
澤愚儒杜衆郡中小吏出於狂慙不足加罪帝謂霸曰
帝欲不諱是何等語而常侍欲原之邪顧使小黃門可
其奏雲衆皆死獄中

靈帝時樂巴爲議即時大將軍竇武太傅陳蕃被誅巴
以其黨復譴爲永昌太守以功自效辭病不行上書極
諫理陳竇之寃帝怒下詔切責收付廷尉巴自殺

張鈞時爲郎中以中常侍張讓所在貪殘爲人蠹害乃
上書曰宜斬十常侍縣頭南郊可不須師旅而大寇自
消天子以鈞章示讓等皆免冠徒跣頓首乞自致雒陽
詔獄並出家財以助軍費有詔皆冠履視事如故帝怒
鈞曰此真狂子也十常侍固當有一人善者不鈞復重
上猶如前章輒寢不報詔使廷尉侍御史考爲張角道
者御史承讓等阿旨遂誣奏鈞學黃巾道收掠死獄中
而讓等實多與張角交通

魏文帝黃初元年十二月長水校尉戴陵諫不宜數行弋獵帝大怒陵減死罪一等

鮑勛爲宮正時文帝欲征吳羣臣大議勛面諫以爲不可帝益忿之左遷勛爲治書執法

蘇則爲侍中文帝時人多饑困而軍數出又兼治宮室則數面諫繇此帝頗不悅其後出爲河東相

晉武帝時詔齊王攸將之國祭酒曹志建議以爲不當遣帝覽議大怒曰曹志尚不明吾心况四海乎以議者

不指答所問橫造異論策免太常鄭默於是有司奏收志等結罪詔惟免志官以公還第其餘皆付廷尉

向雄爲河南尹齊王攸將歸藩雄諫曰陛下子弟雖多然有名望者少齊王卧在京邑所益實深不可不思帝不納雄固諫忤旨起而徑出遂以憤卒

元帝爲晉王時奉朝請周嵩上疏曰臣聞取天下者常以無事及其有事不足以取天下故古之王者必應天順時義全而後取讓成而後得是以享世長久重光萬

載也今議者以殿下化流江漢澤被六州功濟蒼生欲
推崇尊號臣謂今梓宮未反舊京未清義夫泣血士女
震動宜深明周公之道先雪社稷大耻盡忠言嘉謀之
助以時濟弘仁之功崇謙謙之美推後已之誠然後揖
讓以謝天下誰敢不應誰敢不從錄是忤旨出爲新安
太守

後周宣帝爲太子時武帝顧命曰內史王誼社稷臣宜
處以機密不須遠任也及即位憚誼剛正出爲襄州總

管

劉行本掌朝下大夫宣帝嗣位多失德行本切諫忤旨
出爲河內太守

隋高祖初即位虞慶則勸高祖盡滅宇文氏高頴楊惠
亦依違從之唯內史令李德林固爭不可高祖作色怒
曰君讀書人不足平章此事於是遂盡誅之自是品位
不加出於高虞之下唯依班例授上儀同進爵爲子

煬帝時盜賊不止天下大亂納言蘇威每諷諫帝彌不

平後復問伐遼東事威對願赦羣盜遣討高麗帝益怒之

梁毗爲刑部尚書并攝御史大夫事奏劾宇文述私役部兵煬帝議免述罪毗固諍因忤旨遂令張衡代爲大夫毗憂憤數月而卒

蕭瑀爲內史侍郎時煬帝至鴈門爲突厥所圍瑀進計其圍乃解其後帝又將伐遼東謂羣臣曰突厥狂悖勢何能爲以其少時未散瑀遂相恐動情不可恕因出之

爲河池郡守即日遣之

張虔威爲謁者大夫時煬帝數巡幸百姓疲弊虔威因上封事以諫帝不悅自此見疎

許善心爲給事郎大業七年從至涿郡帝方自御戎以東討善心上封事忤旨免官

唐德宗貞元中袁高爲給事中以切直忤旨時宰相齊映連請以高爲左丞御史大夫皆不行

姜公輔爲諫議大夫同中書門下平章事從德宗幸山

南車駕至城固縣唐安公主薨公主帝之長女昭德皇后所生性聰敏仁孝上所鍾愛初詔尚韋宥未克禮會而遇播遷及薨帝悲悼尤甚詔所司厚其葬禮公輔諫曰非久克復京城公主必須歸葬今於行路且宜儉薄以濟軍士帝怒謂翰林學士陸贄曰唐安天亡不欲於此爲塋壠且令造一磚塔安置功費甚微不合闕宰相論列公輔忽進表章都無道理但欲指朕過失擬自取名朕比拔擢爲腹心乃負朕如此贄對曰公輔官是諫

議職居宰衡獻替固其職分本立輔臣置之左右朝夕
納誨意在防微而弼之乃其所也陛下以造塔役費微
小非宰相所論之事但問理之是非豈論事之大小若
造塔爲是役雖大而作之何傷若造塔爲非費雖小而
言者何罪帝又曰卿未會朕意以公輔才行共宰相都
不相當在奉天時已欲罷免後因公輔辭退朕以面許
尋屬懷光背叛遂且因循容至山南公輔知朕必擬改
官所以固論造塔賣直取名據此用心豈是良善朕所

惆悵者只緣如此贊雖再三救護帝怒不已乃罷爲左庶子

蕭復爲相扈駕奉天請別對奏云陛下臨御之初聖德光被自用楊炎盧杞秉政損黷皇猷以致今日今雖危憲願陛下深草睿思微臣敢當此任若令臣依阿偷免臣不敢曠職盧杞奏對於帝前阿諛順旨復正色曰盧杞之詞不正德宗愕然退謂左右曰蕭復頗輕朕遂令往江南宣撫後遂罷之

憲宗元和中王承宗叛詔以吐突承瓘爲招討使右補闕孟簡拜疏論之坐忤旨出爲常州刺史

錢徽爲翰林學士淮蔡未平徽以連年征伐不息與蕭俛俱在宥密迭上疏請罷兵因忤帝旨除右庶子罷內職

裴潏元和末爲起居舍人時有術士柳泌鍊藥帝感之潏上疏請令術士先嘗其藥以是忤旨貶江陵縣令

文宗太和六年百姓上官興殺人危死諫議大夫史館

修撰王彥威累上疏以激切忤旨又咨於執政辭訐氣
盛除河南少尹

疑忌

自古駕御豪傑彈壓區宇必推已以及物執中以作乎
坦蕩爲懷從容肆體堯舜禹湯率繇是矣暨周成惑羣
叔之說姬旦有東山之遷鴟鴞之詩義形怨刺厥後勳
高佐命威足震主爵祿不足以充其賞禮法不足以扼
其勢優崇斯至猜惡彌甚比諸芒刺視如土芥加以讒

構相攻謠讖符合久操兵柄頗得士心或車服僭差交
結靡間或以勞自負不慎厥終故雖漢高之豁達光武
之寬容去就之間猶不免乎媼忌矣矧乃天資峻刻舊
惡是念欲加之罪其無辭乎書曰任賢勿貳又曰任賢
繇已蓋聖哲之明訓也

漢高祖征陳豨還相國蕭何爲民請曰長安地陋上林
中多空棄地願令民得入田毋收橐爲禽獸食

橐禾稈也言恣

人田之不取其橐稅也橐音工老切稈音二早切

帝大怒曰相國多受賈人財

物爲請吾苑乃下何廷尉械繫之數日王衛尉侍

百官公卿

表衛尉王氏無名字史失之也侍謂侍天子也

前問曰相國胡大罪陛下繫之

暴也

前問謂進而請也胡何也

帝曰吾聞李斯相秦皇帝有善歸主

有惡自予今相國多受賈豎金爲請吾苑以自媚於民

媚愛也求愛於民

故繫治之王衛尉曰夫職事苟有便於民而

請之真宰相事者陛下柰何乃疑相國受賈民錢乎且

陛下距楚數歲陳豨黥布反時陛下自將往當是時相

國守關中關中搖足則關西非陛下有也相國不以此

時爲利乃利賈人之金乎且秦以不聞其過亡天下夫

李斯之分過又何足法哉陛下何疑宰相之淺也帝不

懌

懌懌也感衛尉之言故慙悔而不悅也

是日使使持節赦出何

景帝時周亞夫爲丞相帝居禁中召亞夫賜食獨置大

載

載大轎音側吏反

無切肉又不置箸亞夫心不平顧謂尚席

取箸

尚席主席者也

帝視而笑曰此非不足君所乎

帝言賜君食而不設箸此

錄我意於君有不足乎

亞夫免冠謝帝帝曰起亞夫因趨出帝目

送之曰此鞅鞅非少主臣也竟下獄死

武帝時鄭當時字莊以任俠自喜聲聞梁楚間及爲大

司農帝使視決河自請治行五日

治行謂莊嚴

帝曰吾聞鄭

莊行千里不齋糧治行者何也

義縱爲右內史武帝幸鼎湖病久已而卒起幸甘泉

病已

愈也言帝久病既愈忽然即幸甘泉

道不治帝怒曰縱以我爲不行此道

乎銜之至冬楊可方受告緡縱以爲此亂民部吏捕其

爲可使者天子聞使杜式治以爲廢格沮事

武帝使楊可主告緡

沒入其財物縱捕爲可使者此爲廢格詔書沮已成之事也沮壞也

棄縱市

宣帝初即位謁見高廟大將軍霍光從駝乘帝內嚴憚之若有芒刺在背後車騎將軍張安世代光駝乘天子從容肆體甚安近馬及光身死而宗族竟誅故俗傳之曰威震主者不畜霍氏之禍萌於駝乘

後漢光武時馮勤爲郎中給事尚書司徒侯霸薦前梁令閻楊楊素有譏議帝嘗嫌之既見霸奏疑其有姦大怒賜霸璽書曰崇山幽都何可偶黃鉞一下無處所欲以身試法邪將殺身以成仁邪使勤奉策至司徒府勤

還陳霸本意申釋事理帝意稍解

魏太祖初爲董卓所辟太祖變易姓名間行東歸過故人成臯呂伯奢伯奢出行五子俱在備賓主禮聞其食器聲以爲圖已遂夜殺之既而悽愴曰寧我負人無人負我遂行

周不疑幼有異才聰明敏達太祖初欲以女妻之不疑不敢當帝愛子倉舒夙有才智謂可與不疑爲儔及倉舒卒帝心忌不疑欲除之文帝諫以爲不可帝曰此人

非汝所能駕御也乃遣刺客殺之帝持法峻刺諸將有
計盡勝出已者隨以法誅之及故人舊怨亦皆無餘其
所刑殺輒對之垂泣嗟痛之然終無所活初袁忠爲沛
相嘗欲以法治帝後亦殺之

楊脩字德祖好學有俊才爲丞相主簿嘗出行籌太祖
有問外事乃逆爲荅記勅守舍兒若有令出依次通之
既而果然如是者三操怪其速使廉之知狀於此忌脩
且以袁紹之甥慮爲後患遂因事殺之

文帝時滅霸爲鎮東將軍都督青州諸軍事初霸遣別軍在雒會太祖歿霸所部及青州兵以爲天下將亂皆鳴鼓擅去帝即位以曹休都督青州霸謂休曰國家未肯聽霸爾若假霸步騎萬人必能橫行江表休言之於帝帝疑霸軍前擅去今意壯乃爾遂東巡因霸來朝而奪其兵

晉宣帝以玄石圖有牛繼馬後深忌牛氏遂爲二楹共一口以貯酒馬帝先飲佳者而以毒酒鳩其將牛金

景帝夏侯后母曹氏魏德陽鄉主后雅有識度魏明帝世宣帝居上將之重諸子並有雄才大畧后知帝非魏之純臣而后魏氏之甥帝深忌之遂以鴆終

夏侯玄爲景帝所執衛將軍司馬文王流涕請之帝曰卿忘會趙司空塋乎先是司空趙儼薨大將軍兄弟會塋賓客以百數玄時後至衆賓咸越席而迎繇是惡之文帝有密䟽未之屏也如廁侍中鄭小同詣之還謂之曰卿見吾䟽乎對曰否帝猶疑而鴆之卒

王儀高亮雅直爲文帝司馬東關之役帝問於衆曰近日之事誰任其咎儀對曰責在元帥帝怒曰司馬欲委罪於孤耶遂引出斬之

武帝太始初石苞督揚州時諸葛誕初破滅苞便鎮撫淮南士馬強盛邊境多務苞既勤庶事又以威惠服物淮北監軍王琛輕苞素微又聞童謠曰宮中大馬幾作驢大石壓之不得舒因是密表苞與吳人交通先時望氣者云東南有大兵起及琛表至帝甚疑之會荊州刺史

胡烈表吳人欲大出爲寇苞亦聞吳師將入乃築壘遏水自固帝聞之謂羊祜曰吳人每來常東西相應無緣偏爾豈石苞果有不順乎祜深明之而帝猶疑焉會苞子喬爲尚書郎帝召之經日不至帝謂爲必叛欲討苞而隱其事遂下詔以苞不料賊勢築壘遏水勞擾百姓策免其官遣太尉義陽王望率大軍徵之以備非常又勅鎮東將軍琅邪王仲自下邳會壽春苞用掾孫鑠計放兵步出住都亭待罪帝聞之意解及苞詣闕以公還第

明帝時羊鑑爲少府及王敦反帝以鑑敦舅又素相親黨數被嫌責

孝武帝時謝安爲太傅安女壻王國寶專利無檢行安惡其爲人每抑制之及帝末年嗜酒好肉而會稽王道子昏闇尤甚惟狎昵謠邪於是國寶讒諛之計稍行於主相之間而好利儉詖之徒以安功名盛極而構會之嫌隙遂成帝嘗召桓伊飲讌安侍坐帝命伊吹笛伊神色無迂即吹爲一弄乃放笛云臣於箏分乃不及笛然

自足以韻合歌管請以箏歌并請一吹笛人帝善其調
達乃勅御妓奏笛伊又云御府人於臣必自不合臣有
一奴善相便串帝彌賞其放率乃許召之奴既吹笛伊
便撫箏而歌怨詩曰爲君既不易爲臣良獨難忠信不
可顯乃有見疑患周旦佐文武金滕功不刊推心輔王
政二叔反流言聲節慷慨俯仰可觀安泣下沾襟乃越
席而就之捋其鬚曰使君於此不凡帝甚有愧色

後魏道武時鄧淵爲尚書吏部郎謹於朝事未嘗忤旨

其從父弟暉爲尚書郎兇俠好竒與定陵侯和跋厚善跋有罪誅其子弟奔長安或告暉將送出之繇是道武疑淵知情遂賜淵死既而悔之時人咸愍惜焉

庾岳道武時爲司空天賜四年詔賜岳舍地於南宮岳將家僮治之侯官告岳衣服鮮麗行止風采擬於人君道武時既不豫多所嫌惡遂誅之時人咸冤惜焉

賀狄干世爲將初道武普封功臣狄干雖爲姚興所留遂賜狄干爵襄武侯加秦兵將軍及狄干至道武見其

言語衣服有類中國以爲業慕而習之故忿焉既而殺之弟歸亦剛直方唯與狄千俱死

後周武帝忌齊王憲意欲除之謂小冢宰宇文孝伯曰公能爲朕圖齊王當以其官位相授孝伯叩頭曰奉先帝遺詔不許濫誅骨肉齊王陛下叔父戚近功高社稷重臣棟梁所寄陛下若妄加刑戮微臣又順旨曲從則臣爲不忠之臣陛下爲不孝之子也帝不懌因漸疎之乃與于智王端鄭譯等密圖其事後令智告憲謀逆遣

孝伯召憲入遂誅之

隋高祖禪位後封宇文忻爲杞國公帝嘗欲令忻率兵擊突厥高穎言於帝曰忻有異志不可委以大兵乃止忻既佐命功臣穎屢經將領有威名於當世帝繇是微忌焉以譴去官

楊素爲尚書左僕射貴寵日隆朝臣莫不畏附唯兵部尚書柳述以帝壻之重數於帝前面折素大理卿梁毘抗表言素作威作福高祖漸踈忌之後因出勅曰僕射

國家之宰輔不可躬親細務但三日一度向省評論大
事外示優崇實奪之權也終仁壽之末不復通判省事
帝天性沉猜素無學術好爲小数不達大體故忠臣義
士莫得盡心竭辭其草創元勳及有功諸將誅夷罪退
罕有存者

王雄爲右衛大將軍參預朝政貴寵冠絕一時與高顛
虞慶則蘇威稱爲四貴帝惡其得衆陰忌之不欲其典
兵馬乃冊爲司空亦外示優崇實奪其權也雄無職務

乃閉門不通賓客

薛道衡爲內史侍郎上儀同三司仁壽中楊素專掌朝政道衡與素善高祖不欲道衡久知機密因命檢校司徒總管道衡久蒙驅策一旦遠離不勝悲戀言之哽噎帝愴然改容曰爾光陰晚暮侍奉誠勞朕欲令爾將攝兼撫胡俗今爾之去朕如斷一臂於是賚物三百段九環金帶并時服一襲馬十疋慰勉遣之後爲番州刺史上表求致仕煬帝謂內史侍郎虞基曰道衡將至當以

秘書監待之道衡既至上高祖文皇帝頌帝覽之不悅
顧謂蘇威曰道衡致美先朝此魚藻之義也於是拜司
隸大夫將置之罪道衡不悟司隸刺史房彥謙素相善
知必及禍勸之杜絕賓客卑辭下氣而道衡不能用會
議新令久不能決道衡謂朝士曰向使高頰不死今
決當久行有人奏之帝怒曰汝憶高頰耶付執法者勘
之道衡自以非大過促憲司早斷墜於奏日冀帝赦之
勅家人具饌以備賓客來候者及奏帝令自盡道衡殊

不意未能引決憲司重奏縊而殺之妻子徙且末時年七十天下寃之

煬帝即位初楊素爲僕射素雖有建立之策及平楊諒之功然特爲帝所猜忌外示殊禮內情甚薄太史言隋分野有大喪因改封於楚與隋同分欲以厭當之素寢疾之日帝每令名醫診候賜以上藥然密問醫人嘗恐不死

竇杭爲幽州總管時漢王諒之作亂也煬帝將發幽州

兵以討之時帝恐杭有貳心問可任者於楊素時李子
雄爲江州刺史坐事免素進子雄授大將軍

元善爲國子祭酒以高頴有宰相之具嘗言於帝帝初
然之及頴得罪帝以善之言爲頴游說深責望之善憂
懼先患消渴於是疾動而卒

蕭琮梁蕭譽之後雖復羈旅見豪貴無所降下嘗與賀
若弼深相友善弼既被誅復有童謠言其復起煬帝繇
是忌之遂徙其家未幾而卒

宇文弼爲禮部尚書以才能著稱煬帝頗忌之時帝漸好聲色尤勤遠畧弼謂高頰曰昔周天元好聲色而國亡以今方之不亦過乎又言長城之役幸非急務有人奏之竟坐誅死天下寃之

李敏娶周樂平公主女宇文氏爲光祿大夫大業十年煬帝復征遼東遣敏於黎陽督運時或言敏一名洪兒帝疑洪字當讖嘗面告之冀其引決敏繇是大懼數與李渾及渾兄子善衡等屏人私語宇文述知而奏之竟

與渾同誅年三十九其妻宇文氏後數月亦賜鴆而終
庾質爲太史令煬帝性多忌刻齊王暕亦被猜嫌質子
儉時爲齊王屬帝謂質曰汝不能一心事我乃使兒事
齊王何向背如此邪質曰臣事陛下子事齊王實是一
心不敢有二帝怒不解繇是出爲合水令

元弘嗣爲金紫光祿大夫大業中煬帝復征遼東會奴
賊寇隴右詔弘嗣擊之及楊玄感作亂逼東都弘嗣屯
兵安定或告之謀應玄感者代王遣執之送行在所以

無反行當釋帝疑不解除名徙日南道死

楊注大業中爲銀青光祿大夫及楊玄感反河南贊持
裴弘策出師禦之戰不利弘策出還遇注而屏人交語
既而留守樊子蓋斬弘策以狀奏注帝疑之出爲梁郡
通守

樊子蓋大業十一年從駕汾陽宮至于雁門車駕爲突
厥所圍欲潰而出子蓋諫曰萬乘主豈宜輕脫望躬親
出慰撫厚爲勲格人心自奮不足爲憂帝從之其後援

兵稍至虜乃引去納言蘇威追論勲格太重宜在斟酌
子蓋執奏不宜失信帝曰公欲收物情耶子蓋默然不
敢對

魚俱羅爲碣石道將軍征高麗還江南劉元進作亂詔
俱羅將兵向會稽諸郡逐捕之于時百姓思亂從盜如
市俱羅擊賊帥來變管崇等無不捷然賊勢浸盛散而
復聚俱羅度賊非歲月可平諸子並在京雒又見天下
漸亂終恐道路隔絕於時東都饑饉穀食湧貴俱羅遣

家僕將船米至東都糶之益市財貨潛迎諸子朝廷微知之恐具有異志發使案驗使者至前後察問不得其罪帝復令大理司直梁敬真就鑠將詣東都俱羅相表異人目有重瞳陰爲帝之所忌敬真希旨奏俱羅師徒敗衄於是斬於東都市家口籍沒

唐太宗貞觀中李君羨爲左驍衛大將軍武昌郡公貞觀中有謠言當有女主王天下太宗惡之後當宴三品已上遣作酒令仍各稱其小名君羨自稱小名五娘子

太宗愕然因大笑曰何物女子如此勇猛其後竟以事
誅之至天授中則天復其官爵

魏徵爲特進知門下省事嘗密薦中書侍郎杜正倫及
吏部尚書侯君集有宰相之材徵卒後正倫以罪黜君
集犯逆伏誅太宗始疑徵阿黨徵又自錄前後諫諍言
詞往復以示史官起居郎褚遂良太宗知之愈不悅先
許以衡山公主降其長子叔玉於是手詔停婚顧其家
漸衰矣

德宗時嚴震爲山南西道節度使帝忽遽行幸梁州山
南地素貧褊又遭連山賊剽劫之後雖云十五州之地
其寔未敵江南三數縣戶口震悉心供應人既不擾事
亦不闕然累奏百姓困竭須使支持帝以爲結恩於百
姓也

嚴懷志以涇原裨將隨渾瑊會吐蕃背盟懷志等陷沒
居吐蕃中十餘年逃入吐蕃以西諸國爲所掠賣又脫走經
十餘國至天竺占波國泛海而歸貞元十四年始至溫

州徵詣京師德宗以懷志處蕃久不欲令出外囚之仗
內順宗即位始釋之初懷志之陷父母俱存及歸父母
皆歿妻嫁他人

呂溫者以小吏事崔漢衡貞元初吐蕃背盟漢衡爲吐
蕃所虜將殺之溫趨往以背受刃吐蕃義之繇是與漢
衡俱免及漢衡歸獨留蕃中吐蕃尚浮屠法溫因求爲
僧久之乃得歸亦以習吐蕃事囚焉順宗即位釋之與
嚴懷志俱授中郎將

憲宗元和十二年淮西平十三年襄陽節度使李愬奏請判官大將已下官凡一百五十員帝不悅謂裴度曰李愬誠有奇功然奏請過多使李晟渾瑊之勲業又何如哉遂留中不下

後唐莊宗在鄴時明宗爲相州刺史天祐十三年滄州小校毛璋以城歸欵莊宗命明宗率師至滄州愬撫軍民明宗既至毛璋開門迎謁遣璋入覲軍城又安時書吏誤爲申狀云某已至滄州禮上畢莊宗覽狀大怒曰

諱

諱明宗名

反邪時末帝掌莊宗親軍在帳下顧謂末帝曰

爾父固予所悉此蓋王建立安重誨戲予斬二僕之首而還末帝惶恐既而明宗旋師行臺斬其書吏謝之乃移安國軍節度使李存審鎮滄州承制授明宗安國軍節度邢洺磁等州觀察處置等使

安金全爲朔州刺史事莊宗爲騎將莊宗神勇冠世而性忌不欲臣下勝已故金全與王建及位不踰刺史多稱疾以避禍

愍帝應順元年正月以內皇城使安重益爲陳州刺史去冬秦王之釁重益將騎追王至府解出之伏下害之至是帝心惡之不欲在左右仍令典方州

三月遣供奉官王廷悅劉贊各以玉帶金錯刀賜秦州張延朗興元張虔劉竺帥各進潞王書疑其兩端故有是賜

無斷

傳曰惡惡而不能去善善而不能用此優游不斷之謂

也自漢而下居民上者或失於剛克之訓存夫兼容之
道淑慝斯混失於洞分幾微有初閤於先見不能斥去
邪說割絕私愛念宗社之大計思邦國之永圖而乃牽
於文義制於近習惑於衆多之說迫於權倖之勢以至
猶豫靡決禍釁旋構噬臍無及發矢莫進蓋夫當斷不
斷其爲害大矣誠方策之深戒焉

漢元帝時蕭望之死擢周堪爲光祿勳堪弟子張猛爲
光祿大夫給事中大見信任弘恭石顯憚之堪性公方

自見孤立遂直道而不曲是歲夏寒日清無光恭顯及
許史皆言堪猛用事之咎帝內重堪又患衆口之浸潤
無所取信時長安令楊興以材能幸常稱譽堪帝欲以
爲助乃見問興朝臣斷斷不可光祿勳何邪斷斷忿嫉之意也斷

音牛斤切興者傾巧士謂帝疑堪因順旨曰堪非獨不可於

朝廷自州里亦不可也臣見衆人聞堪前與劉更生等
謀毀骨肉以爲當誅故臣前言堪不可誅傷爲國養恩
也帝曰然此何罪而當誅今宜奈何興曰愚以爲可賜

辭關內侯食邑三百戶勿令典事明主不失師傅之恩
此最策之得者也帝於是疑會城門校尉諸葛豐亦言
堪猛短帝因發怒免豐帝又曰豐言堪猛貞信不立朕
閱而不治又惜其材能未有所效其左遷堪爲河東太
守猛槐里令顯等專權日甚帝牽制文義優游不斷爲文
義所牽制故不斷 孝宣之業衰焉

成帝時大將軍王鳳用事會日蝕京兆尹王章素剛直
敢言乃奏封事請退鳳章每召見帝輒辟左右辟讀時
曰關

太后從弟長樂衛尉弘子侍中音

弘者太后之叔父也音則從父弟

獨

側聽具知章言以語鳳鳳聞之稱病出就第上䟽乞骸

骨謝帝曰臣材庸愚慙得以外屬兄弟七人封爲列侯

宗族蒙恩賞賜無量輔政出入七年國家委任臣鳳所

言輒聽薦士常用無一功善陰陽不調災異數見咎在

臣鳳奉職無狀此臣一當退也五經傳記師所誦說咸

以日蝕之咎在於大臣非其人易曰折其右肱

豐卦九三爻辭

也肱臂也此臣二當退也河平以來臣久病連年數出外曠

職素餐此臣三當退也

空廢職任徒受祿秩也

陛下以皇太后故

不忍誅廢臣猶自知當遠流放又重自念

重音直用切

兄弟

宗族所蒙不測當殺身靡骨死輦轂下

靡碎也音武皮切

不當

以無益之故有離寢門之心誠歲餘以來所苦加侵

誠實

也日月益甚不勝大願願乞骸骨歸自治養冀賴陛下

神靈未埋髮齒朞月之間幸得瘳愈復望帷幄不然必

寘溝壑臣以非材見私天下知臣受恩深也以病得全

骸骨歸天下知臣被恩見哀重巍巍也

巍巍高貌重音直用切

進

退於國爲厚萬無纖介之議

論者不云疏斥外戚也

唯陛下哀憐

其辭指甚哀太后聞之爲垂涕不御食帝少而親倚鳳

弗忍廢乃報鳳曰朕秉事不明政事多闕故天變婁臻

咸在朕躬

婁古屢字

將軍乃深引過自予欲乞骸骨而退則

朕將何嚮焉書不云乎公母困我

周書維誥載成王告周公辭也言公必須

留京師母得遠去而令我困

務專精神安心自持期於亟瘳稱朕意

焉

亟惡瘳差也

於是鳳起視事帝使尚書劾奏章死獄中自

是公卿見鳳側目而視

晉武帝知太子

即惠帝也

弗克負荷然恃皇孫聰睿故無廢

立之心復慮非賈后所生終致危敗時朝廷咸知不堪
政事帝亦疑焉嘗悉召東宮官屬使以尚書事令太子
決之太子不能對賈妃遣左右代對多引古義給使張
泓曰太子不學陛下所知今宜以事斷不可引書妃從
之泓乃具草令太子書之帝覽而大悅太子遂安又賈
充既爲帝所遇欲專名勢而庾純張華溫顛向秀和嶠
之徒皆與任愷善楊珧王恂華廣等充所親敬於是朋

黨紛然帝知之召充愷宴於式乾殿而謂充等曰朝廷宜一大臣當和充愷各拜謝而罷既而充愷等以帝知之而不責結怨愈深

惠帝居大位政出羣下紀綱大壞貨賂公行勢位之家以貴凌物忠賢路絕讒邪得志更相薦舉天下謂之互市馬賈后將誅楊駿段廣跪而言於帝曰楊駿受恩先帝竭心輔政且孤公無子豈有反理願陛下審之帝不答

孝武帝時會稽王道子荒恣博平令吳興聞人與上疏
陳之帝益不平而逼於太妃無所廢黜乃出王恭爲兗
州殷仲堪爲荊州王恂爲僕射王雅爲太子少傅以張
王室而潛制道子也道子復委任王緒繇是朋黨競扇
友愛道盡太妃每和解之而道子不能改中書郎徐邈
以國之至親唯道子而已宜在敦穆從容言於帝曰昔
漢文明主猶悔淮南世祖聰達負愧齊王兄弟之際實
宜深慎帝納之復委任道子如初

隋煬帝時趙才爲右侯衛大將軍帝幸江都待遇踰昵時江都糧盡將士離心內史侍郎虞世基秘書監袁充等多勸帝幸丹陽帝廷議其事才極陳入京之策世基盛言渡江之便帝默然無言才與世基相忿而出

唐高祖時太子建成令楊文幹起兵及高祖馳使召太宗以謀之太宗曰文幹小豎狂悖起兵州府官司已應擒勦縱其假息時刻但須遣一將耳高祖曰文幹事連建成恐應之者衆汝宜自行還立汝爲太子吾不能效

隋文帝誅殺骨肉廢建成封作蜀王地既僻小易制若不能事汝亦易取耳太宗既行元吉及四妃更爲建成內請封倫又外爲遊說高祖意便頓改遂寢不行復令建成還京居守唯責以兄弟不能相容歸罪於中允王珪左衛率韋挺及天策兵曹杜淹等並流之雋州後太宗宴於建成宮中毒高祖乃謂太宗曰發跡晉陽本是汝計尅平宇內是汝大功欲升儲位汝固讓不受以成美志建成自居東宮多歷年所今復不忍奪之觀汝兄

弟終是不和同在京邑必有忽競汝還行臺居於雒陽
自陝已東悉宜主之仍令汝建天子旌旗如梁孝王故
事太宗泣而奏曰今日之授實非所願不能遠離膝下
言訖嗚咽悲不自勝高祖曰昔陸賈漢臣尚有遞過之
事况吾四方之主天下爲家東西兩宮塗路咫尺憶汝
即往無勞悲也及將行建成元吉相與謀曰秦王今往
雒陽既得土地甲兵必爲後患留在京師制之一匹夫
耳密令數人上封事曰秦王左右多是東人聞往雒陽

非常欣躍觀其情狀自今一去不作來意高祖於是遂
停

玄宗天寶十四載時肅宗爲皇太子安祿山至雒陽有
詔以太子監國召宰臣楊國忠常見素謂之曰皇太子
仁孝朕尋欲傳以大位今遇寇難委之監國正副朕懷
事寧之後朕當高枕耳帝往在東宮恭謹仁孝日聞於
外百姓思傳實位十餘年矣及下詔之日國人相賀楊
國忠專宰朝政祿山反以誅國忠爲名盛言國忠號國

夫人罪惡六軍將士皆切齒願除其黨以解國難國忠大懼聚族而哭入而號訴於貴妃妃悲號銜土請命於玄宗翼日有司進儀注遂寢而不行天下失望

代宗時李栖筠爲御史大夫時元載專政栖筠正身守道無所畏懼垂入相者數四帝憚載有內外之助竟不能決猶是依違累年竟以憂憤邁疾薨海內痛惜之

德宗建中四年十月在奉天靈武留後杜希全鹽州刺史戴休顏夏州刺史時常春合率兵六千赴難將至帝

召宰相盧杞闕播與白志貞渾瑊同議來路利害杞與志貞以漠谷路爲便瑊曰漠谷險隘必爲賊所邀不若取乾陵北過附栢城守固而行便取城東北雞子堆下與城中犄角相應且分賊勢朱泚必不敢更於陵寢往來杞曰漠谷路近若慮逆賊邀擊即此出兵應接更取乾陵路過恐驚陵寢城曰今朱泚圍城斬伐松栢以夜繼日驚動多矣况又城中事危諸道救兵不至唯希全等率先赴難所繫不輕若此軍得於雞子堆下營固守善

地則朱泚可以計破杞曰陛下以順討逆豈同逆賊乎
若令希全等北來即是自驚陵寢白志貞後贊其言帝
重違之遂命取漢谷路景子希全等軍至漢谷路果爲
逆賊邀擊奪據水口乘高以大弩巨石左右夾擊殺傷
頗甚

文宗開成三年正月五日宰相李石自親仁里將曙入
朝盜發於故郭尚父宅引弓射石矢纔破膚馬逸而迴
盜伏坊門揮刀斫石斷馬尾竟以馬逸得還私第帝聞

之駭愕遣中使撫問賜金瘡藥因差六軍兵士二十人
衛從是日京師大恐常叅官入朝者九人而已旬日方
安石拜章辭位者三乃授荆南節度使李訓之亂起石
於常僚之中付之衡柄石忘身徇國不顧患難振舉朝
綱國威再復而中官仇士良切齒惡之伏戎加害帝深
知其故不能理乃至罷免及石赴鎮賜宴之儀並闕人
士傷之恥君子之道消也

後唐莊宗同光二年中書奏曰諸道節度防禦刺史各

著功名並全忠孝洎蒙昇獎皆荷渥恩雖萌爲治之心未展分憂之効况聞藩府不可以久虛侯伯不可以久缺藩府虛則兵不輯侯伯缺則化不行繇此觀之爲務甚惡請令歸本任不奉詔旨不得輒離治所從之是時諸藩府連帥或屯師于邊或在闕下皆遣人權典後事人望既卑法多掇斂時議甚危之宰相故有是奏帝雖依允終却遲留及後王室危難驟起鄴都率繇此也

四年三月壬戌宰相豆盧革率百官上表請出內府財

帛勞軍以軍情有變故也其辭畧云臣竊知內府所積有餘租庸贍軍不足今內外諸軍室家不能相保儻非此時安卹臣懼人心離合表奏不報時知星者上言昨夜惡星入大庫宜散帑藏以給三軍又奏流星犯天棓主御前有急兵宜爲之備帝召宰臣於便殿劉皇后出宮中粧奩銀盆各二并皇子滿喜等三人謂宰臣曰外人不知謂內庫金寶無數諸道所進旋以給賜今宮中有者即粧奩嬰孺而已可市之贍軍草等惶恐而退時

出錢帛給賜諸軍樞密使張居翰宣徽使馬紹宏唐
王供奉內使景進各獻錢幣數千以助賞軍是時編吐
饑饉軍士之家乏食連營婦女掇蔬於野衛軍日望頒
給復怨租庸剝削月糧諸軍騰口流言不息宰臣延英
奏對每請出內府財以給諸軍帝將行之尋爲劉后所
沮而止既而鄴城變擾軍人幸其搖動縱行優賞不滿
其心至是積錢帛金銀賜之軍士負物而詬曰吾妻子
已殍方與賞錢莫吾陳力一何謬也議者聞之知禍亂

旦夕矣

閔帝時朱洪寶與康義誠有隙應順元年潞王據岐陽將稱兵向闕二月辛酉義誠將議出征閔帝幸左藏庫親給軍士錢帛是日義誠與洪寶同於庫中面論用兵利害洪寶言自出軍討逆累發兵師今聞小奴無一人一騎來者不如以禁軍據門自固彼安敢徑來然後徐圖進取全策也義誠怒曰若如此言洪寶反矣洪寔曰公自惟誰反其聲漸厲帝聞召而訊之洪寶猶理前謀

又曰義誠言臣圖反據發兵計義誠反必矣閔帝不能明辨命斬洪寶既而義誠果以禁軍迎降潞王

廢帝清泰元年六月三司使劉昫上言天下州郡於天
成二年括定稅率迨今八年近有民於本道及詣闕訴
田不均乞簡視累行蠲放漸失賦租請朝臣中選清強
巡行簡視從之昫奉詔便欲曉諭樞密使韓昭裔言俟
更詳議其事不報帝猶豫少決皆此類也

冊府元龜卷一百八十一